

Hala tuju baharu ekonomi Malaysia

PUTRAJAYA - Kerajaan akan memperkenalkan hala tuju baharu ekonomi negara yang akan memastikan rakyat dapat menikmati kemakmuran bersama serta menyelesaikan kemelut ekonomi yang dialami sekarang.

Perdana Menteri, Tun Dr Mahathir Mohamad berkata, inisiatif yang akan diperkenalkan itu mengambil pendekatan 'Kemakmuran Bersama' dengan meningkatkan kuasa beli rakyat dan menghapuskan jurang pendapatan dan kekayaan antara kelas, kaum, wilayah serta jurang rantaian bekalan yang melampau.

"Kemakmuran Bersama adalah usaha menjadikan Malaysia sebagai sebuah negara yang terus-menerus membangun secara mampan seiring dengan pengagihan ekonomi yang adil dan inklusif di setiap peringkat," katanya.

Dr Mahathir berkata demikian dalam Perutusan Perdana Setahun Malaysia Baharu kerajaan Pakatan Harapan yang disampaikan di Pusat Konvensyen Antarabangsa Putrajaya (PICC) di sini semalam.

Bagi mencapai matlamat itu katanya, kera-



Dr Mahathir bersama Timbalannya, Datuk Seri Dr Wan Azizah Wan Ismail hadir pada Majlis Perutusan Perdana Setahun Malaysia Baharu di Putrajaya semalam.

jaan menggariskan sekurang-kurangnya tujuh teras strategik yang perlu ada antaranya penstrukturan dan penambahbaikan ekosistem perniagaan, menjana sektor pertumbuhan baharu, reformasi bakat dan sumber tenaga dan memperbaiki pasaran buruh dan pendapatan pekerja.

Selain daripada tujuh teras strategik tersebut, kata Dr Mahathir, kerajaan juga telah mengenal pasti pemangkin lain seperti dasar fiskal yang progresif, tadbir yang integriti tinggi, penghasilan latihan pendidikan teknikal dan vokasional (TVET) bernilai tinggi dan modal sokongan kewangan kompetitif.

Kerajaan juga akan berusaha memastikan penyampaian institusi kerajaan yang efektif, kestabilan monetari, data raya yang komprehen-

sif dan terangkum dan masyarakat sivil yang berpengetahuan untuk menyokong matlamat dan program Kemakmuran Bersama bagi mencapai keberhasilan terbaik.

Dr Mahathir berkata, ekosistem perniagaan dan industri negara perlu ditambah baik supaya kekal relevan dan memenuhi kehendak ekonomi masa depan.

Untuk itu, penggunaan teknologi dan Revolusi Industri 4.0, pengurusan yang lebih terkini dan efektif, penggunaan pakai ekonomi digital menyeluruh dan peningkatan kemahiran pekerja bernilai tinggi penting untuk melonjakkan ekonomi negara ke aras yang lebih tinggi.

- *Bernama*